



ESTD. MARCH 2008

JANUARY 2024

Hinna Vâk

AN ORGAN OF THE TANGPHAI PRESBYTERIAN CHURCH



KUMTHAK CHIBAI BUKNA

- Hattak leh hangsan tak in um phawt mai in
- Khanglaite leh Lungthim thak
- Khawvel nawpna'n vai a hawm hi

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India

EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Hawipakkim, Secretary, CKNP
: Upa Genminlun, Secretary, CKKP

Business Manager : Pu Lalbiaklian, Office Superintendent
TPC Office D. Phailian
P.O. Box 107 CCPur-795128 Manipur
Phone No. +91 9089623251
Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. KUMTHAK CHIBAI BUKNA	04
4. HATTAK LEH HANGSAN TAK IN UM PHAWT MAI IN	05
5. KHANGLAITE LEH LUNGTHIM THAK	09
6. KHAWVEL NAWPNA'N VAI A HAWM HI	12
7. SERMON	
a) Thawkna hi bang ziak a hi em?	15
b) Vangam chabi kawltute ihu hi	21
c) Ezekiel 3:17 ; 33:7-9	23
d) Kochuam Khrista taksa	27
e) Pathian ko hun	32
8. KNP HUANG	35
9. KKP HUANG	36

Moderator : Rev. Kamkhotinthang Neihzial
Secretaries : Rev. Thanglianlal (Sr.)
Rev. Andrew LR Khiangte (Jr.)
Finance Officer : Rev. S. Khaikhawlam
Statistician : Upa S. Thongzalal
Executive Secretary : Rev. S. Lama Vaiphei
Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Kumthak 2024 ei puitungtu Pathian kiang in kipak thu gen hitiu. Kochuam tin te'n thagau lam maljawlna dawnna kum ah i neithe chiatna ding un pauchap hitiu.
2. Hinna Vâk hi kum 16 tiang ting thei ah ei puitu Pathian kiang in kipakthu gen hitiu in, lamzang tak ah a chia zawm zel theina ding in a buaipute a ding in dawn hitiu.
3. Pastor Bial KKP Conference Taksa leh Thagau ah lawting tak ah mat a hi theina ding in pauchap hitiu.
4. Gamsung buaina ziak ah panlatu pawl chuam chuam ah puitute a ding in pauchap hitiu.

KINEPNA THAK

Hinnavak simtu zosia Lalpa Jesu min in Kumthak Chibai ka hun buk hi. I gam buaina leh haksatna kâl ah kumthak mel dawium tak ei lêngkai tu Lalpa chu lopina chang ta hen.

Buaina hin bangchan dai ding a hem ti i he puau ah, zia gual ma chun malai i khankhua gual kha mangkit ding i hiu em, a sang ah nuam zaw gam ah Lalpa'n ei puilut gua a hem tile i he diak puau hi. Maleh, buaina chimchâk zia ah taimang ziang thei dinmun ah i ding paw ngal ua, kinepna hing i nei uh Lalpa Jesu hung kilat ding ngak in zia hun haksa hi chingthei tak in mang hi tiu. Judson chun: *“khawvel hi ka chimchâk pua, ka nasep te hile ka chimchâk diak puai; ahinla, van kona chang ta leng chu school naupang in pelna dak a git ah lim leh kipak tak ah a bag kipuak ah a nu leh a pa te kiang zuan ah a tai gualin kei le lim takin tai ingka”* a ti a hi.

Khawvel hi a nawp bek ziaka um i hi puau a, i lawina Kochuam uh hile Thagau lam ah beltâk pen a hi zia ah lawi i hi puau hi. Zia gualma a chu i insung uh hile khawvel ah i dawî pen uh i tel uh a hi pua, eimau ziang hile i hi utpen uh ki hilo, i chennawpna gam pen ah cheng le ki umlo a hi. Maleh, Lalpa ei kawina mun a hin lungawi takin um hitin kum 2024 hi kinepna hing tak nei kawm in mang pan kit tiam hi tiu. Kumlui ah sakeibaknei kam apat hun hukdawktu i pau Pathian chun kumthak a hinle a khutpek lopi sung in nang leh la insung mite hun vengbit ta hen.



Kochuam Huang

Office Assistant 3 leh Sweeper 1 contract extend

Synod Service Board Meeting 4:2 chun Office Assistant Mi 3 leh Sweeper Mi 1 Contract ah ala kila chu a contract hun uh a bei tâk ziak in a chungchang genkhawmna nei in a contract uh kumkhat suksau (extend) kit a hi.

Contract extend piak ah umte

-

1. Pu Langlalthamuan, O/A
2. Nk. Chingngaihlian, O/A
3. Tv. Thanglemlian, O/A
4. Nk. Pakkim, Sweeper

Semtu Pension chungchang

Synod Executive Committee Meeting 7:16 chun Pi S. Lemnu, Office Receptionist cum Book-seller chu January 1, 2024 ah pension ding a hi ziak in a thasang ding in Lianboi Neitham, Evangelist Chingmei chu Office ah Receptionist cum Book-seller ding in a guat hi.

Relief House Phase – II sakzawm zel a hi

Gam buaina ziak ah hung taidawkte umna ding Relief In kisa chu Kochuamte panlak na jal in malam sawn jel in, Phase – II na sak ding ah In ki bithiak sia le chai thian a hi vang vang tai. Sumtukphai khua ah sak ding sia sak chai phawt a hi ta, Buallian khua sak ding sia hi chaithian hinailo ma leh January thasang a hin chai hung hi ding a hi.

Revival Speaker lak thak thu

Synod Revival Committee 2:3 chun tu ah Synod in Revival Speaker i nei zing laite hi a term uh bei ta ding ahi ziak in Revival Speaker Mi 4 ma lak thak ding lemguatna ala nei in December 20, 2023 (Nilaini) in Revival Speaker ding Interview ala nei thei ua, a nuai ah sia hi Synod Revival Speaker ding in lak a hiu.

1. Pu Kamzathang,
Gangpimual Kochuam
2. Tv. ST Satboi,
Centenary Kochuam

HINNA VÂK

3. Tv. M. Sasang,
Centenary Kochuam Speaker lak thakte leh a
teamte chu January 12, 2024
ah Synod Office mun ah
4. Tv. Lianthangpui,
Hill-Town Kochuam Orientation Programme um
ding a hi.

Pastor Transfer & Posting

Synod Kikhawmpi chun kumthak, Kum 2024 apat Pastor-te umna
ding ziagual hin a siam lem hi.

Min	Umna di	Induction neitu ding	Induction ni
Rev. Thanglianlal	New Lamka	Rev. S. Lama Vaiphei	14.1.2024
Rev. Paulalsiam	Kangvai	Rev. Kamkhotinthang Neihzial	14.1.2024
Rev. S. Genlianpau	Munpi	Rev. P.B. Zosaphara	14.1.2024
Rev. S. Kumar	Chingmei	Rev. S. Khaikholam	14.1.2024
Rev. Th. Samuel Vaiphei	Jiribam	Rev. Lalrintluanga Ngente, A/S Barak Area	14.1.2024
Rev. Thangtinlal Suantak	Bangaluru	Rev. Eric Lienlalmuon	14.1.2024
Rev. Minthianboi Vaiphei	Phaipheng	Rev. Lalgin Vaiphei	14.1.2024
P/P C. Kailianson	S. Munnuam	Rev. Thianganlim	14.1.2024
P/P Lamgoulian Hatlei	Panglian	Rev. Thangneipau	14.1.2024

KUMTHAK CHIBAI BUKNA

Jesu Khrista min thiangtho in Tangphai Kochuamte zosia Kum Thak Chibai !

Manipur gam sung leh mun tin ah buaina ziaḱa thêzakḱa um zosiate Kum thak dawisakḱa thu ḱa hun thawt hi.

Hun pha ei pia, Kum Thak ei pui gal ḱaipa, Lapa chu pakḱin um ta hen ! Lalpa'n la umna mun chiat ua Kochuam a dinga ginum zing ding leh A min chawihawi ah, a gam let zêlna dinga theitawp sua chiat dingin hun mang chia chiat hen la. Lalpa chun a Hepina leh a dawisakḱa chun hun ḱaihuai zing ta hen !

Lalpa'n kum ḱhat ei belap piak ḱitna ahin ḱawng bangkima "Kipan thak ḱit dingin" ḱa hun chial hi. Chapa Taimang pa ngei ḱhale a din mun siat zia leh bawl ḱhial zia a hung ḱihetchian phatin "A hung kipan thak ḱit a" apa ḱiang a zawt ḱit ḱhan masangah apa ḱiangah a um lai sangin chanpha thupi zaw diaḱ a chang ḱit ahi ḱha. Jonah ngei ḱhan le achia lona ding a zawt leh buaina namenlo a tuak hi. Maleh, a bawlḱhial leh Pathian thupiak mang lo a shi a hung ḱihiat daw phatin "A kipan thak ḱit a" amah le siam thakḱin ahung um a, Nineveh ḱhawpi le hukdaw in a um a hi ḱha.

Ziaziakachun, Pathian in Kum Thak ei piak ahin, Thilpiak leh Nasep, Kikhiawp, Bible sim, Pauchap leh adang dang te ahin "Pan la thak ḱit leu hin" Lalpa'n ei tung ding ḱit ngei in a !

*Rev. Kamḱhotinthang Neihisial
Moderator,*

Tangphai Presbyterian Church Provisional Synod

“HAT TAK LEH HANGSANTAKIN UM PHAWT MAI IN”

(Joshua 1:1-9)

~ Rev C. Lalrinliana
i/c Kangvai Pastor Bial

“Thu ka hun pia la hi, hat tak leh hangsantakin um in; lau kin la, lunglel diak kin; LALPA la Pathian chun la chiana taphot ah hun umpi zing ding a hi ngal ah”

Thumapui : Kum 2024 kumthak ei pui tungtu Pathian chu pāk in um hen la. Buai leh haksatna chuam chuam kal ah Pathian phatna leh hepina chang to zel thei dinmun in i um ua, Pathian phatna hi a lopi ma ma a hi. Hun leh phat chu a pangai in chia zing ding a hi. Hun a chia zing laiin thil dang tam tak hung kitheng zel ding a hi. I ngai leh i it ma mau te tawh kikhen ding i hui a, a dam um intin, a dam lo le um zel ding a hi. I kipakna ding, i da na ding hung um to zel ding a hi. A pawimaw pen chu Sam ziktu in i um dan dingte chu Lalpa chung ah ngan la a ti gualin, hun neitu leh siamtu Pathian hi i mau ei pui piak dinga i chial zel u hi a hawi pen a hi.

Gingtu zosia chu ki tilkho sek, kifui sek i hui a. Setan chun zia hi a zakda pen a hi kit a. Ding dawk thei talo dinga ei siamtu pen a hi. Himaleh, a hat pen le a hatlo pen ah um theina khawvel a hi ziak in gingtu zosiate hin kisuniam

tua lo in, kitilkho hat tua zawk hi Pathian dawgual a hi.

1. Joshua a buai a hi em?

Mosi hun a chai ta, Pathianin Israel chate pui dingin Joshua a hun tel a hi. Joshua hin a huphul ma ma

a hi mai thei, zo thei ding in a kingai lo le a hi maithei Pathian chun tilkhona thu a hun gen piak ziang a hi. Joshua dinmun ah i vak dinpi a hi leh a BP hi sang tho dingin a ginchakum a hi. A ziak chu puitu Mosi kianga hun tam zawk mang sek a hi. Thalek a Pathianin ama apat thil lopi tak tak abawl te mu tu a hi. Tuipi San a kan u kha le mit ah mu chian ma ma tu a hi bawk a. Puitu Mosi gual khan Israel chate pui zel chu huphul ma ma himai thei a hi.

Joshua buaina hi buaina awm tak a hi. Hilele a muchian ma ma chu Israel chate puitu kha Mosi hi lo in Pathian a hi. A lau, a huphul, haksa a sa maithei hilele Pathianin a guatna chu nawl a gua diaklo a hi. Pathian chun hun panpi zel ding leh hun umpi zel ding a hi ti a hetchian ziakin a mawpuakna mualsua dingin pan a la zaw a hi.

2. A launa a bei ziang puai :

Mi zosia hin lau i nei chiat ua, i lau te chu lau lo ding ti ziang hin a buaina a sunavak lo a hi. Lung lau kei lo hin Gul a lau ma ma thei a hi. Gul lau kei lo in Lung a lau ma ma thei kit a. Thim lau i um ua, thim launa neilo i um kit zel a. Mei chang lau i um a, meithal a git phat leh a gitna lam va del i um kit zel tho a hi. Figure hawi a hawi mawm lau i um kit zel tho a hi. Lau lo ding a hi ti hin i lau nau a subei diak lo a hi.

Joshua hile Pathian in lau kin a ti a hi. Joshua launa hi bei ziang lo ding a hi. Hilele, a launa zosia tawh Pathian a nai a, Pathian in a piak mawpuakna supiting ding in a kisa ziang a hi. A thi a hem a dam a hem a Pathian chun hun panpi ding, hung umpi ding leh hun kitawnpi ding a hi ti a het ziak in a launa chu a lawtinna dal tu ah a mang nuam lo mai zawk a hi.

HINNA VÂK

Kiting pum pum a Pantu mawpuakna hun supiting ham ham te hin Pathian a su kipak a hi. Lau leh haksa sa ma ma chung a Pathian na sem ham ham te chung a hin Pathian a lungawi sek a hi. Beidawng ah puk mai lo in, lau leh kithing pumin i hukdamna na hi mualsua ding ihu.

3. Joshua hi pawsal diktak a hi:

Khuaizu leh bawngnawi luanna gam, Kanaan gam chu target hi zing ziang a hi. Melma leh Kanaan mi te tawh kido ngai a hi thu hi a naupang pen tiang in le he suak vek ding u a hi. Melma tam di dan te, a do ding te hat leh hat lo dan te, a galvan neite chu hechian ma ma ding a hi. Hilele, Pathianin a guatna chu a theitawp a sep phawt chu a tup a himai hi.

Pathian nasepna ah hin pawsal hi a pawimaw khawpmai. Thepna a hung ah puk ziang te, thawk lau

ziaka Pathian panpina dawt ziang te hi gingu umchan hilo a hi. Thepna khenkhat te hi chu mani in i siam kawm le a hi sek a. Thepna hung tun masanga zolo dinga kisak ziang hi gingu tak tak a hi theilo a hi. Pathian panpina pang lo a zaw thei thepna hile tampi um tho a hi.

Joshua hin chu a melmate a hechian a, a target a hechian baw k a, a sepai te hatdan a hechian baw k a, a zui Pathian a hechian baw k a. Ama a lunglelna leh launa um chu kawi tha phawt in, Pathian thil tup zawk chu supiting dingin, Pawsal tak in pan a la a hi.

4. “Hun umpi zing ding ka hi”:

Zia thu hi Joshua hangsanna bul hi ngei ding a hi. Joshua hi tangval a hi ta pua, sungkuan nei a hi. Ama sang in a zi leh chate’n a thuak uh chu lau ma ma ding a hi. A gal nei dingte

le a lungthim su buai ma ma ding a hi. Hilele, lei leh van siamtu leh neitu, a mamaw'u zosia ngaitua piak a, gal dang chuam chuam te zaw piak tu in, 'hun umpi zing ding ka hi', a hung ti khel ah thamuan um chuam hi umlo maithei a hi.

Pathian nasepna chuam chuam ah hin le zia thu ma hi Pathianin a na semtu te chung a gen chu a hi. Kochuam gensiatna te, Pathian nasepna ah sungkuan kithuapina bangma i dawnlo te, sungkuan ah Setan in i Pathian nasepna subuai dinga pan a lak chang te, mitthi thiak hul pum pum a Biak In ah mel lim tak sua a ngai chang te, thina ziaka Pathian chung a lungawi lo chung chung ah Pathian na sep zawm ngai te, theitawpa Pathian nasem a, pakchatna sanga demna i dawn tam zawk chang te, Zu leh khamtheithil in sungkuan ei sukbuai

chang te, tinglo kisak ziaka Pathian na sem ngamlona te, kum upat ziaka taksa leh lungthim hat zo lo na te, haksakna chuam chuam ten ei suk buai chang te hin, Pathian thamuanna thu, "Hun umpi zing ding ka hi", ti hin hatna leh hangsanna ei piatu a i mat thiam a pawimaw a hi. I Pathian hin ama naitu chu a nai ziang sek a hi.

Thukhakna : Pathian nasepna hi mihing hatna leh mihing hangsanna tawh a baw a baw chi hilo a hi. Pathian hi limlang ah mang zel hitinuh, Pathian nasem tâklo leh tinglo i hi dan hi muchian masa phawt hitin uh, zia zaw lamah chun Pathian hatna leh hangsanna hi mang to thei ding i hiu. Hat leh hangsana kisakna hin chapon a hin daw sek zia in, Pathian kingaitawmna puan i sil zing a, Pathian hi lim et ah i mang thei zel uh a hi chun, rawngbawl na lawk tak leh phachuam tak mang thei zel ding i hiu.

“KHANGLAITE LEH LUNGTHIM THAK” (1 Timothy 4:12)

~ Rev. Minthianboi Vaiphei
D. Phailian Pastor Bial

Khawsakna’u khawvel ahin i kiheina lam lam hi khanglaite khut ah um a lam e..! tithei hial in ah. A hawilam, a phalam ah kal i suan uchun thamuanpi umtak i hi gual un a selam ah kal i suan khâk ua leh le sautak at kek theigual i hikit ui. Thilpha lam ah kineppi umtak i hi gual un a phalo lam inle siamphat thei tâk lo khawp ah lungzinna tuntutu i hithei kit bawk ui. Aizawl Theological College (ATC) ah BD zil ding ah kakalsuan kuan in kapi’te pakhat in 1 Timothy 4:12 mang in tilkhona ei la nei ah, hun hung chiazal in, lungput chuam chuam nei lak’a leh tuifawn in eihun nawk ek hunte a um hun inle ei sudet sem leh masawn zel na dingah matchak in a hung pang daih a hi. Lungput dan siamthak zel na chun khat geldan ah kawkhuk ah tumden tâk bep ah gel tele malsawmna matchak ah Lalpa’n tungding kit thei tho tho ahi e! Ziaziak tak achun, thahat lai khanglaite’n lungput lam ah banggual dinmun nei i hui em tih i siamthak zel uh a kûl hi. Khanglaite’n kochuam chiazal na ding leh khawtâng hindan ah le hinman umtak khawsakkhawmna a umthei na dingah mawpuakna i neite’u sulang thak kawm in pan i lak zel dingdan uh, kochuam lam awndeu in a la holimkhawm ding i hui.

1. Khanglaite hi kochuam ah i pawimaw taluau tih nial guallo thudik ahi e..! Taksa hat nalai i hi zia un lungthim le a hat ah. Nisin hinkhua i matna’u ahin i mulam zosia te’u hi huphul takluat tile neilo phial i hisek ui. Lam chuam chuam

ah iki muanngam hun uh a hi zia kin thagau lam ah i khanna ding ua ei mapuitu kochuam puitute hial le thasit deu ah um khak thei ahi. Ahinla zia chu i petmang na ding ua ei nawtu dawu umlo tak a hikit zia kin i pilvan takzet uh a ngai kit hi.

Kochuam kiziltilna te apat thuphengphel chu a thagau hinkhua tiang ah khawtua um a hi ziakin thu âwitak ah um chu i damna ding pen uh a hikiti hi. Ziakachun, i Kikhawpi'n a belguat Pastor leh Upate za kawm ah kipuihuai sak nachâng i hiat thak uh a ngai hi.

2. A bîktak in ei Presbyterian Kochuam hi mumal tak ah chia leh kivaipua ihu tih hiatmil guat lohial ding ahîi i tikit nuam ui. Kochuam hat semna dingah dinmun pawimaw tak luatute ihu ti le ihia'sa'u a hikha.. Sum leh pai hawlna hi'n mani tha seng ah malakna'n le khanglaite hi kochuam in ei kineppite i hi ziakun, khawvel hindan tawh kituak zâwng ah eima'u phurna leh tuina lam ah chia'kâl ngakla pai mailo in kochuam malakna te supiting dingah kisêng ngam te hizaw di'n lungput neithak kit hitiu.

3. Kikhawpna him him ah khanglai a hung tam ngei ngei leh a nawp'dan chuam bîk eive maw.. A umzia chu khanglaite hi bang lam bang lam a le boruak sulumtu leh

chawk-hal tu ihu tina le a hi e! Tutianga hin chu Khanglai Kikhawp ngâikhawk tak te i hitau a, a thamuan um pantai. Hinla, zia bep ah chun hunsak kha'itieu ti a lau um a hi. Dan hawkim (**Danzokim i lati tângpi khak uh**) Kikhawp le kiti hial sek Nilaini Zân Kikhawp leh Kiginni Zân Kikhawp tehi kochuamte kikhawpna ah mi tawmpen hun a hisek maihi theng danglam tadingin khanglaite'n panla thak taitiu. Nilaini Zân Kikhawpna diak diak hi kochuam ser leh sâng te bawl zân a hisek ziakin a kizillai ei uh â dingin i hiatna'u suvâktu eivei! Bang ni hi'n bang kikhawpna hiziang le le a malatu leh ettawn thei ding khawp in panla diak taitiu. A diak in **Pathian Biakna kikhawp zosia ngai pawimaw** hi iki bulphuna'u in mang thak kit hitiu.

4. Thiamzilna a pat in "a hung khanglian zinglai tehi nampi khuampi ahîu" tikha khanglaite'n i hiat chiat uh a hi. Tunî'n vang Khristian Khanglai Pawl hi hun hung

HINNA VÂK

chiazel ah kochuam puitu ding kizilna leh kisekna ahi ti hangsan tak in i gen ngam ui. Khanglai hatna kochuam chu a hing a, kochuam nuam leh hulim a hitei tei sek. Alelam in, bang atia kochuam ah nasemtu ding kibasam sek ahem? Bang ziaka kochuam ngui leh thi del dul ah umkhasek ahem? A **ziak pipen** chu Khristian Khanglai Pawl nasepna a **kiakniam** leh **lawsapna** **ziak** himai ahi. Ziagual natna lau umtak sukbei veng veng na dingin khanglai suanum te'n **kochuam khut leh keng** hi dingin **kipedawk** in **kisalawk thak** kit hitiu.

Tu ah i holimkhawm nate'u ban ah hin khanglaite'n i chung ua kinga mawpuakna tamtak i neite'u gen sêng nailo ihu. Kochuam tamtak ah kochuam puitute'n khanglaite chaw phur a pibawl ua, talent lultak tak a neite'u tawden piak kêi lo in a mang phachuam thiam zawu ah. Khuti a hizing lai in kochuam khenkhat te'n huphulna mit ah en a hi diam uh aw..? tithei khawp in a tawina lam lam ua soiselna ding bep hawl le a umda diak

puai. I kineppi khanglaite'n a ngaidan uh leh dawidan te'u zalen deu ah a tut ngamna dingua kochuam puitute le kihawn a kulna um ngei in ah..

Khaile, kumthak maitua ta i hi dungzui un, hun chiatasa te kitukdên saklo ah masawna ding a hi phawt leh thu âwithei tak leh ziltîlna ngaisak ah masawna gam lak belap zel dingin thahat lai zosiate kilân thak kit hitiu. I taksa'u hi i lungthim uh a thak ah a um masia chu lân theilo ding ihu tih i hiatmillo ding uh ahi. I lungthim teu, i dawitelna teu Pathian kiangah iki tuklut phawt ualeh i taksa'u lat ding chu haksa talo ding ahi. I holimkhawmna te'u zosia hi kumthak ah iki tawnpî dingun dawitelna siam thak kit chiat dingin khanglai thahat lai zosiate'n '**khai ei!**' ti'n panla thak diak hitiu.. Lalpa'n ei malsawm piak chiat ta'hen..! Amen.

“La khangdawng hi'na kuama'n hun musit ki'hen; himaleh, pau dan leh tawidan, hepina, ginna leh thianthonate ah chun gingtute etton dingin um zaw ta'n..”

“KHAWVEL NAWPNA’N VAI A HAWM HI”

~ M. Sasang

Revival Speaker

Bible a hin hun bang tik a hem kallak sin leh Pathian ngaisaklona, khawvel thil ah dutuina hun mudi a um zing ah, Noah khang hun in Pathian sâng in nek leh dawn a uar bawl ua (Mat. 24:38) tulai hin le zu, khamthei, damdawichang leh kikap thaw chite hin khangthak te a zaw thaw ma ma ah, soal khamnathei leh tisa nawpsakna mai te taisan ding a thala un, a lutchil deu deu un, a ngawlpi hial uh a hi.

Sual vaihawm dan chu nêk leh dawn ah te leh tisa nawpna sukpitin, nungak tangval lai ah leh nupan hilo ah nupan nun matte khawksaklona a lian ma ma ta, zia gual hun hi Noah hun bep hilo in, Sodom leh Gomorah khua mite kha le khawvel nawpna in ala puk sia’u ahi kha (Ezk. 16:49). Pathian ngaisaklona a hung lian a, gamsung ah Pathian thu a puksiat hun in Pathian lungnatna zia in mihing te manthaina a tung sek a hi kha. Noah hun in سوالنا zia in tuisang let in khawvel ah Noah te sungkuan tilo a thibei sik sek uh a hi kha. Sodom leh Gomorah khale asual na zia

ma un mei leh kât in Pathian in a hal vam hi. Noah hun leh Sodom leh Gomorah hun ah khaw helo ah soal a chen lai ua, Noah leh Lot te inkuan Pathian in a hukdawk ah (2 Pe. 2:5 ; Thl. 19:15), soalbawl migilo te a suk mangthai gual in, Mihing chapa a hung kit ni phat leh le zia gual chu hi ding a hi (Luk. 17:29-30). Khawvel سوالنا a sâng tak zia hin Jesu hung kitna ding nai zia a sulang ma ma ta a hi. Tu hun hi khawvel Boruak phalo gâl leh tual in ei tun khum a, Noah hun leh Sodom leh Gomora hun ah mite siatna nasat dan tawh tu ah i gam din mun hi a kibang ma ma ah, zia

HINNA VÂK

hun hin thil thak, a sia a hem a pha hung paw dawk ngei in ah. Pathian gam Rupchal (Rapture) le ahung pawdawk khamai diam? Bang chu hi ta leh, Gingtu Kochuam te a ding ah pawimaw chu, *“Gitlona’n a hun nuaisia ding in um kin la, himaleh, phatna’n gitlo chu nuaisia zaw tan. Rom. 12:21.”* ti hi a hi.

Khawvel nawpna’n vai a hawm khum gingtu hilo ding in Kochuam te’n pan i lâk thak zel uh a pawimaw tak zet hi. Noah gual ah sualna tuipi kinawk lak ah Pathian ang ah midik (Thilsiamthu 7:1) hi ding ah panlakna ding tampi a um hi.

Khawvel a um nawpna (1 Jn. 2:15-17)

Pathian in khawvel hi ngaina ki un, khawvel ah thil umte, taksa nawpnate, Mitmu nawpnate, hinna kisaktheina te a mangthai khawm zing a hi, Pathian lunglam hitute kumtuang ah umzing ding a hi atia, zia hi taksa gam bep ah hilo in, Thagau gam in le a dik hi. Ei gam bep hilo in, gam lian zaw leh gam changkang

haw le a hi tho hi. khawvel (lei chung) mi hing umna zosia inle dik vek ina.

Khawvel nawp na in vai a hawpdan anuai ahin Point thum vak en hitiu.

Taksa Gam ah :

1. Hotu hi utna: Zia hi khawvel nawpna vaihawm utna ziak lianpi te lak ah khat a hi. Hotu hi utna ziaka tualthat ngam, zuau gen ngam, nekduk khawk salo hina gam a hi ta a hi.

Hotu ahi leh, a hilo le hisak thei, a hi lai le hilo sak theina. A lian leh vaihawm theite hatna gam chu i chenna’u gam hi a hi mai ta diam?

Tu hun khawvel boruak setak hun ah gingtute lak ziang a le Pathian dawng ta lo, kikhawmlo, Bible sim talo, Pauchap talo ah hotu hi gua, Pathian lam sang ah khawvel Vangam gual a mang mudi atam ta khawp mai hi, nawp na in vai a hawm tak dan chu, mitin hotu hi a ut ziang nau hi a hi.

2. A um denlo ding go : A

um den lo ding go kichu na khawvel a hin eimau â bangma a um pua, Pathian â ngen chang a hia, a enkawl ding ah ei ngansiate bep i hui hi (Sam 89:11 ; 50:12).

A hin, mihingte haw hin ei a dan ah gel in i ki neisak gaw sek uh a hi. Tulai i gam ua lâ kithang mama a um talo Pu LS Mangboi Lhungdim in a siam/phuak “*I gam hilo ham*” ti hih a hia, i gam, i gam i ti lai ah Pathian in ei etkawl sak mai, a neitu diktak chu Pathian a hi lam hetmil khâk ding lau um ma ma a hi.

Tu chung Manipur gam buai na hin mi tamtak te chun nei leh lam, In leh lo i chên/mansua ua, hinna tiang chên/mansua le i tam uh a hi. Khawvel ahi ei â a um pua, i hinna ziang le eithu a hi puai. Pathian â ahi ti i het uh dawi a um ma ma hi. Khawvel nawp na in vai a hawm tâk zia a hin ei uh a gual ah gel na in, i lungthim uh i lua dim sak kha sek uh a hi.

3. Damsawt nuam na:

Khawvel ah mihing taksa inchen genthei pen ah kigel te leh damtheilo mama te haw ziang khule dam nâklai a nuam ua, teksia, bangma hithei talote haw le a dam ut nalai ham ham uh a hi.

Khawvel sang ah mun pha zaw leh nawpzaw thi nung van khawpi um hete ziang hawle khawvel ah, hin leh um naklai ham ham a ut uh a hi. Magnet (Thikhip) in thik ahip gual in, khawvel nawp na’n mihingte ahip zota lua hetlo kal in nawpna sual in mihingte lak in zung ala khaw thuk ma ma ah khawvel thangaina a lian a hi.

Khawvel hi Pathian thu sang in khawvel nawpna in vai a hawm zaw, khawvel lopina leh hawi nate et in Pathian lam ngalote ding in chu khawvel Pathian ah nei a bailam ma ma hi. Gingu Pathian Kochuam te’n vang zia thim thuneina lak ah i Khristian na’u Chanchinpha vâk ah mite salvak thei chiat ding in Lalpa’n simmtute zosia ei malzawl chuat ta’u hen.

“THAWKNA HI BANG ZIAK A HI EM? BANG GUAL AH LA DAWNGSAWN DING A HI EM?”

(Sam 119: 69-71,72 ; Thupuan 2: 10)

~ Rev. Ngurthanmawia Sailo

Khawvel ah mite'n hiaththiam haksa i sak ma ma'u, dawtna i Siam zing'uh, himaleh dawnhu haksa i sak ma ma kit'uh chu ; bang ziaka khawvel a hin thawkna um a, i Pathian uh hi hepi Pathian kiti ngal a, bang ziaka siatna lian tak tak te, vangsiatna huaisia tak tak te hi khawvel ah tung zing a hi diam? Zia gual thil a tung zing lai a hin, Pathian khawi ah um a hi em? Ti hi i dawtna'u a hi zing hi. Zia gual a hin le dawtna a um sek hi, Judate hi Pathian nam têt i ti'u a, a hinla, Hitler in Juda-te nuai 60 a thâ lai ua khan, Pathian khawi a um a hi em? Kum 1950 tawp lam a kipat 1970 lai vel chan a khan theology mak tak tak mai *Theothenatology* Europe leh South America vel ah chun a minthang ma ma mai a, Greek pau a chun *theo* ti chu **Pathian** tina a hia, *thanatos* ti chu **thi** tina a hi. Pathian thi tina a hi. A hung suminthang tute theologian khenkhat Thomas JJ Altizer, Gabriel Vahanian, Paul Van Buren te a hui. Zia ngaidan lian tak mai a hung pawtdawk dan hile kidopi panina a khan mihing 30 million apat 60 million kikal vel thi a ngai a hi. Tichun, dawtna lian deu tak mai hung umta chu, bang ziaka mihing zia zozai mai thi hi Pathian in a phal a hi diam? Bang ziaka zia gual siatna khawksia tak mai hi Pathian in a tun sak? Zia ziakchun Pathian hi a thi ta a hi, bang ma a bawl thei ta puai! ti ngaidan lian tak mai a hung piang dawk ta a hi. Zia hun lai vel ah Billy Graham a dawtna'u “Ka Pu, Pathian hi a thi tak tak a hi em?” a

dawnhuna “A thi nailo hin a, tu zingkal a khan le ka kiho ui” a ti te hi a lopi ka sa tak zet hi.

Awle, thawkna lam ah khan lut kit ta leu hin, khawvel chanchin khangthu tuma apat tuni chan vak ngaitua ta leu hin, khawvel hi natna leh thawkna in a lua dim kei ti thei mai in a, zia gual chu a hi tâk zia kin, i lunthim ua dawtna um zing sek chu Pathian in bang ziaka i thawk’uh a phal a hi diam? Ti hi a hi. Zia ah thawkna te hin mihing hinkhua ei subeidawng thei a, dik taka gen ding a chun Pathian-um-ginglo (Athiests) i titeu hin le Pathian umlo a ginna zia k’uh lian pen chu khawvel ah thawkna a um sek zia k hi a hi. Kum 1945 lai vel apat khan America tangval 2 Chuck Templeton leh Billy Graham te chu a hung minthang daw k khawm’ua, minthang zaw ding ah mite’n a ginchat zawk’uh Templeton chun a ginna haisan in Pathian um a nawl ta, a rawngbawlna le a chawlsan ngal a, a khaw k

khawp mai hi. Pathian a nawlna zia k chu Life Magazine kâwm (cover) ah kitâk lim Africa numei pakhat in kialpi a thawk lai ua a cha nausen pai ah lungkham taka vân lam en zing lai a mu a kipat a hi. Bangkim hi thei Pathian a hi chun bang ziaka bang ma bawl lo a thîl zing thei a hi diam? Dawtna dawnhu haksa tak mai a hi. Kei ngei inle zia gual hi ka la tuak kha, Jharkhand ah ka um lai in ka ki fellowshipna’u ah Chairman le a la hi khata, vangsiat um tak in a zî’n cancer a hung vei ta thut mai a, Kochuam te’n le nasa tak in ka pauchappi sek’ui, himaleh a dam thei tak tak pua, a lungkham ma ma’u hi. zia hun ah a Pa’u dawtna chu “Bang ziaka Christian te’n cancer kivei thei? Ti hi a hi. A nû’in cancer a vei chu a hethiam thei pua, a sakhua lui lam ah a kile kit tai. Thawkna te zia k a hin dawtna a tam sek ma ma hi. Manipur- ah

HINNA VÂK

Khristiante Biak In 300 vâl a kisia, Khristian te In 1000 vâl a kihâl thâk lai leh mi tam tak a thi lai ua khan Pathian hi khawi a um ah, bang ziaka ei hukdaw lo a hi diam? Dawtna a tam ma ma hi, ziaziakchun, bang ziak ah thawkna hi hung um a hi em ti hi thiam dan dan in gen ding i hiu.

Thawkna hi dawitêl theina Pathian in ei piak i mat diklo zia'ua hung um a hi. Mi khenkhat chun thawkna a um phat leh "Pathian in ei hepi tak tak lo hin a" ti i chîng mai sek ua. Himaleh, Pathian in ei hepi ma ma zia in dawitêl theina, a sia leh a pha hiatna ei pia, dawitêl theina hi i mat diklo phat leh i thuak sek hi. Pathian in dawitel theina hi ei pe lo hita hen la, a thu thu gual deu a um ding hi leu hin Pathian chu a fair kei puai ki ti kit mai thei a hi. Pawsal te'n i zi te'u hi nasa deu in control in neukhat ziang le a dawi dan um thei ta lo leu "ka pawsal in ei hepi ta luai" ti sau sau lo maithei la hiu, "ei hepi kei

puai, ei ginglâ hi" ti'n la tin' uh haksâ sa ma ma ding i hiu. Zia ziaakchun, Pathian in dawitel theina ei piak hi ei hepi zia zia'ua a hi. Thawkna hung kipatna i mu thei uh chu Eden huan ah a hi. Pathian in dawitel theina a piak ngei mang in thil gilo a bawl'ua, zia ziaakchun khawvel ah hin thawkna a hung um pan ta a hi. Bang zia ah Manipur gam ah buaina um a hi em? Buaina um kha pha zaw ding ah a ngai zia uh a hi mai hi, kuama cha sawlkar in buaina siam ding in a ut lo sa sa'u in a sawl lo uh a hi. Zia gual baw ma chun khawvel ah thawkna tam zaw hi dawitelna ziaka hung um tângpi a hi. A thuaktu'n pha sa lo maleh thawkna hung um sak tu'n pha a sak zia ah hung tung hi ding in gingchat a um hi. I dawitelna'u mang in mani leh mani i kisuna'u a, i insak inthang te â ding ziang inle haksatna leh thawkna tuntu i hi khawlaw sek hi. A zia hawitak um in thawkna a hung tung sek hi. Nu leh Pa

te ziang inle a ziak hawi tak a um lo chun i chate'ua i beng ngai puau hi, i chate â ding in thawkna i siam piak ngailo a hi. Nu leh Pa te'n i chate i zêp ah i vawk hun inle i hepi lo tina a hi puau, i hepi ziak a hi zaw sek hi. I hepi ma ma zia kin mi pha zaw a hi theina ding bep ua i chate chung ah thawkna i tun sak sek a hi zawi. Zia gual chet chun, i phatna ding dawina zia kin Pathian in i chung ah thawkna a tun hi a phal a hi.

Bang gual in zia thawkna chu masawn ding i hui em?

1. Miphate thawkna chun thilhitheina a keng khawm sek hi: Pûkna zia kin khawvel ah thawkna a hung um dan i gen tau a, zia zia kin chun khawvel ah hung piang ta zosia'n i masawn ding, i pumpel thei kei lo ding chu thawkna hi a hi. I Kor 3: 21 a chun *“zia zia kin chun, mihingte suang ki hen. Bangkim hi nang uh â a hi”* ti i mû a. Lal Jesu gingtu i

hi zia kin bep ua thawkna te pumpel thei ding i hi diak puau hi. A chang chang leh ginglo mi te hin chan phazawk chang diak a hi ding'ua aw ti hun a tam sek hi. Bible i phet chun, Genesis ah kipat Thupuan bu kikâl a hin thawkna thu tam tak mu thei in a um hi. Himaleh, thil lopi tak hung lang dawk chu mi pha te thawkna a chun thilhitheina a um hi ti hi a hi. Bible ah mipha Job thawkna chanchin ah kipat a hin mi bangzat tak in thawkna lak ah le thamuanna i chan khawlaw ta diam'uh maw! Lunsunna tuak Insung mite thamuanna ding inle tuni chan in i la mang zing nalai uh a hi. Lal Jesu thawkna zia kin hukdamna i chang kit thei ua, a zilsakte thawkna zia kin khawvel mun chuam chuam ah chanchinpha the dal in a um hi. Zia gual hin ka ngaitua sek hi *“Thawkna hi a la um lo hitaleh khawvel ah hin chanchinpha kithe*

HINNA VÂK

dal lo ding a hi” Tertulian chun “Martarte thisan chu Kochuam â ding in thaichi mu a hi” tiin a la gen hial a hi. Ziaziakchun, gingtute thawkna chun thilhitheina a keng khawm hi.

2. Thawkna mang in Pathian in a lam ah ei kai nai sek

hi: Thawkna hi a la um lo hitaleh bang gual in i um ta ding’ua? Thawkna ziak in Pathian i nai sek ui. Malzawlina tam tak i dawn lai sangin thawkna i thawk lai in Pathian i nai zaw sek hi. Khawvel ah testimony lopi tak tak te hi thawkna ah kipat hung kipan tângpi a hi deu zel ui. C.S. Lewis chun “Pathian in i nawpsak hun in awl châ’n ei hil gu sek a, i sia leh pha hiatna ah thu a gen sek a, i natna ah vâng ngai tak in ei ko’h sek hi, natna hi khawvel bengngawng kaithawna kikona ah matchak a hi” A dik khawp mai hi, zia khawvel ah hin natna te hi tuak ngai lo hile hin, mi

tamtakte chu Pathian ah kipat gamla tak ah i um uh ka gingcha a hi. I natna te mang in ama nai ding in ei la kai nai sek a hi zawi. Sam 119: 67 ah chun “*Hi genthei ah ka um ma khan ka la vâkmang sek a, tu hin vang la thu ka zawm tai*” a ti. Chun, châng 71 ah le “*La thu guatte chu ka zil theina dingin, hi genthei ah ka um hi a phai*” ti i mu bawk uh a hi. Ziaziakchun i pet mang lona ding’uh leh lamdik i mu theina ding’un i chungah thawkna hi a hung tung sek a. Zia chu i hiat zing a pawimaw a hi.

3. I thawk lai in Pathian in ei umpi zing hi:

Mi khenkhat chun thawkna i masawn lai in Pathian hi a dik puai i ti sek ua, ahi khawp mai, thawkna i thawk zing lai hin Pathian in gamla tak ah kipat ei la thâl hi leh chu Pathian a dik puai i tiu hi dik thei ding a hi. Chun, Patian in ei hukdawk ding tup lo kei hileh a dik puai

i tiu hi dik thei ding a hi. Himaleh, i Pathian uh hin i thawk hun a hin gâl ah kipat in eila thîl mai puai, i thawkna ngei a hin ama le a hung pang a, ama ngei khawvel ah a hung a, a mi te natna a chun ama le a hung nâ, a mite thawkna a le a kap hial a hi kha. Khatvei chu, numei pakhat hi Pastor kiang ah a hung a, dawtna a dawng a, “Pastor, ka chapa a thi lai a khan Pathian hi khawi tak ah um a hi diam aw?” a hung tia, Pastorpa chun “La chapa a thi laia khan Pathian chu a chapa thina mun a khan a um zing hi”a ti. Thawkna i thawk lai in Pathian in ei nusia ngai pua, zia lai tak i hiat zing ding’ua pawimaw ma ma chu, a chapa neisun le migilo te â ding ah thawk phaltu Pathian hin i thawk uh le phal ngei ding a hi. Himaleh, zia thawkna i thawk lai ah chun le gâl

ah kipat in ei en mai pua, ei thawkpi a, i kiangah ei thamuan ding in a um zing hi.

4. Thawkna um tâklona mun ah ei pui ding a hi:

Mihing te hi Ui-te, Akcha te, leh gancha te thi gual a hin i thi nung tak uh leh um ve tawp mai ding hi ta leu hin chu Pathian ei siam dan a hin ki kipak khel lo mai thei a hi. Himaleh, khawvel hi i khawsak tâwpdenna mun ding uh a hi puai. A tawp pen a chun Jerusalem thak ah thawkna leh natna um tâk lona mun ah ei pui in a. Zia tak mun ah chun natna leh thawkna um ta puan tin, khawlum leh khawvawt le um ta puan tin, nuam zosia chên ding i hi tau hi. Zia mun chu i tun theina dinga chun “Ginum leh pha taka umin, Ni sin a nâ sem hitiu, a lopina chu chang dingin, dam sungin sem zing hitiu”.

“VANGAM CHABI KAWLTUTE I HIU HI” (Mathai 16:18-19)

~ *Upa S. Thongzalal*
Hill-Town

18. Zia suangpi chung a hin ka kochuam lem ing katin; mithi kul kawtkhak chun lang zo pua'n a.

19. Van gam chabi chu la khut in pia'ng ka tin, lei ah la kân chu van ah le kân hi'ntin; lei ah la thap chu van ale thap hi'n a, a tia.

Gingtu mimal tin te hi Krista suangpi chung ah kinga i hi nau em ti hi a pawimaw masa chu a hi. Mangthai kinep na him neilo ihi zing lai in Pathian hepina thûktak ziak in a chapa changkhat nei sun ei pe ta. Ka Lalpa'n kei a ding mama in a thuakta'n, ama kivawk thidupna, amualphona te a suk dam a um kahi ti zosia te chu Krista suangpi det chung ah ki nga a hi.

Zia gual gingtute chu khawvel buaina chuam chuam te'n damsung haksatna, damlona, thina tiang in zo puan a, Lal Jesu'n ati a hi. Lal Jesu ah ki nga gingtute hi hun zosia in Jesu tawh umkhawm a nuam ui. Ama nawp na sang in a Lalpa dawidan a ngai pawimaw zaw zing hi.

Vangam chabi kawltute i hiu hi

Mihing hina ahin mithiam deu, thiamlo deu ti a um thei hi. Mihing ki bat kimlona himai intin, gingtu hina in vang mawpuakna pawimawtak ki bang chiat ah ei piak Lal Jesu sep bâk sem zawm ding ah thupiak i mu'u. Van-gam chabi piak ihu.

Alopi in mawpuakna a sang hi. Jawlnei Jonah lungthim a chun Assuriate hi Israelte melma, amaute sawisa, that sek, sal a man sek (captive) tute ahiu ah. Ziaziak a chun, Jonah a ding in lungsiat ah Pathian hukdamna thu va gen haksa mama ding ahi na tiang a um hi, beplo in Pathian in gawt in himangthai leh ti hi a dawilam hina. Pathian hepina hin Assuria tele a huap hi. *“zia lungthim Jesu Krista ah um kha nangmau ale um ta hen; Pathian tawh ki bang ah um chu, thil khiakla thei a ngailo in; himaleh, ama chu mihing*

a hung ki siam in, suak gual a hung ki hi niam in...” (Philipi 2:5-7)

Unau dawitak, Krista lungthim pawding in ei til a hi. Mihing hatna'n haksa ahi'n, zaw ding gual ahi pua'i iti maithei hi. Khawvel in a hetlo *“...thagum hatna ziak hilo, thilhitheina ziak le hi diak lo in, ka thagau ziak bep in ahi, ti'n sepia hawnte Lalpa chun a ti'n.” (Zekariah 4:6)* galvan hat pen leh chungnung pen gingtute'n i kawl Pathian thuhing, Jesu Krista lungthim pawthei ding in Lalpa'n hun umpi ta hen. Amen.

-
- *Pengpelep chun zakcha kawm kawm in Patlungbawm (Caterpillar) a hi lai hunte a nung thil pua, zia gual ma chun ei un le hun chiasa i um dante nungthil in zakcha kawm kawm in hinkhua mang pua hitiu. Hun chiasate hi tu ah i dinmun i tung thei na dingah ei siamtu a hi. ~ Anthony Gucciardi*
 - *Sakeibaknei chun zik leh sim a zil masangsia tuanthu zosia chun gamvakpa chu chawihawi zing in a. ~ African Proverb*
-

“EZEKIEL 3:17 ; 33:7-9”

~ *Upa Kaikhanpau*
Leisang

“Chutichun, nang mihing, Israelte galvengpa hidingin ka hun guat la hi tai. Bangtik hun hileh ka thugen la het taphawt, kei ah kipat hillawkna thu chu la gensawn sek di a hi”

Nebukadnezar Babulon lengpa'n gambung chuam chuam leh Aigupta a hun zaw nung in Jerusalem a hun sim a, a zo tai. Zia taka chun mipha cha cha mi melpha, pilna leh thiamna nei a hun mankhawm phawt a, zialai taka chun a pa Nebopolassar thi a hun hephut a, dawigual a cheman lo in, Sal ah a mat te leh Sana no, ûm leh bel temple ah a lakte tawh Babulon lam in a kile kit tai. A mi matte lak a hin mi pali Danial, Hanania, Meshael leh Azariate a pang ui. Mi pali te hi Babulon thiamna zil in a umsak hi. A min te'u le a then piaka Danial-Beltesazzar, Hanania-Shadrak, Meshael-Meshak, Azaria-Abednego ti in. A min then piakna ziak ahileh Babulon Sakhua leh Nam dân a zui theina ding uh a hi.

A niveina ding in Nebukadnezar in Jerusalem a hun sim kit a, mi tamtak sal in a pui a, Babulon lam ah puito lo in Aigupta gam lam ah pui in Kebar lui pang ah lo leh huan bawl in a um sak hi. Zia te lak a hin Ezekiel le a pang hi.

Zia tak ahin ahi Ezekiel hin Pathian a kipat Israelte Vengtu/

enkawltu hi ding a mawpuakna a mu. Ei uh Pastor, Upate hi le Ezekiel Israelte enkawltu leh vengtu hi dinga Pathian in a guat gual in i mi, i sa, i kochuam te enkawl di leh vengtu hi dinga Pathian in ei guat a hi. A lopi e, lopina Pathian chang hen. Sal ah tâng Israelte hin haksa sa ma ma'n sal hi pum a na vak sep

chu haksa a sa diak uh a hi. Sam 137 zia La hi châmbângte La a hi a tiu hi.

“Babulon lui gei a te chun i chuu ah a hi, i kap sek ui, Zion i ngaitua un. Luilai a huisûm a te chun i dingdung teu i bâng sek ua, Sal a ei puite chun la Zion La pakhat bep sa ding in ei phut ngen sek ua, migam a te hin Lalpa La bangtin em ka sak thei ding uh. Aw Jerusalem ka hun hiatmil chun ka khut changlam hin a thil thiamna hi hemil mai ta hen. Ka hiat zinglo chun ka lei hi kadang in bek den mai ta hen, a limna pen sanga Jerusalem ka dawî zawklo chun” a na na maizen e!

Ei uh le tu i dinmun uh hi i et leh Israel châmbâng te gual hin um thei zing i hi veu. I kikhawp phat ua leh dâk la gitalo, Khristmas Kumthak dawigual tak a manga, i Pathian chawihawi a limtak a lâm ah La sa nidang gual a ki um thei talo. Puaknat a um! Bangtik leh gal te’n ei hung bukap in khawilam in ka zam diam, kua ka bêl diam kua In awng a um diam ti ngaitua imut tui taka imut ti la um talo, nek leh châk tui taka nek la um talo. Tu ah

Sermon ngaitha U leh nau te i Pathian lo ngal hi bel di um lo a hi. I Pathian hi ginum, Hautak leh titakzet in a ma hi biaitui. I Pathian i suk lungdam nak leh i maban di chu Ama’n ei ngaitua piak na’n a.

Nebukadnezar Israelte suak leh sala puitu kha a hung thi ta, a chapa Belshazzar a hung lal a, khawvel gam zosia a ma thu nuai a um ahi zia in a hung ki uansak a; nikhat chu a siamang leh khawnbawl te tawh luai the zu dawn in, zu a hungkham ah, Nebukadnezar in Jerusalem a sim lai a, a hun puak no a khan zu a hun dawn ta. Zia laitak a chun bâng a khutbawm ngawn in lekha a hung ki zik a “MENE MENE TEKEL PARSIN” Bûkin la um a, la tingzo ta puai. Persia Leng Kura a sepia te taw a hung ua, gate la khak hilo, a hunglut ua, a Lalpau Belshazzar a hung man ua khau a bulsak ua Babulon Lalna a tawp tai.

Mede-Persia in vai a hun hawm tai. Kura in saltang Nehemia leh a lawite a hun thadawka kulbâng chim a va entha a siatlo na him him a mu tapuai. Ama lawi upat na’n

HINNA VÂK

kulbâng a hun siampha kittau.

Israel saltang thadaw lo tamtak a um nalai ui. Lal le a hung kitheng ta Ahasuel Lal in a hung chu tai. A zi Vasti hi melpha tak a hin. A melphat dan hi mipi laka taklang a, hung ki show ding in Lal in thupiak a bawl tai. A hi zia in Vasti in a la nial ah a va kilang nuam tapuai. Zia phat a chun Lalpa a lungna Lalnu a nawl tai. A thasang in saltang Juda mi numei melpha ma ma. Mordikai suapipa chanu Mordikai in a umpi Esther chu lengnu ding in a hun têt tau.

Mordikai hi leng In a kawtkhak ngak a pang a hi. Haman, Lengte siamang Agag mi. Agag hi Amalekte lengpa min a hi. Amalek hi Esau tupa a hi (Gen 36:12). Haman hi Mordikai in salam a piak nawplo sek zia a lungawi lo a um zing. Mordikai khailup theina di ngaitua a khailup na di natiang bawlsa kawi a hi. Haman thupiak in Israelte zosia tha chimit di ti order a hi. Persia dan la phel kik theilo. Lalnu Esther in pan nasa tak in a la, kuale Israelte that ding a hung taphawt amau inle a la that thei in au ti order a hun siam dawk tai. Israelte that

ngam kua ma a um tapuau. A suakcha tau. Esther lengnu hina hi Juda saltangte'n a phatchuam piu ei. Ei uh Pastor zite, Upa zite, i mi isa, i kochuam te bitna ding leh khanto na ding in pan la zawsem hitiu.

Chuleh ka gennawp khat kit chu Jesu a thawkit nung in nungzui te kiang in a va kilâk a, *"Thuneina zosia ka kiang a piak a hi tai. Ziaziak chun chia unla nam tin a mi nungzui in siam unla, Pa leh chap leh Thagau Thiangtho in baptis un, la kiangua thu kapiak zosia zawm ding in zilsak un, ngaiun kei kumkhua'n la kiangua um zing di ka hi"* Matthai 28:18

Lalpa thupiak dungzui in nungzuite le muntin leh gamtin in a chiau a, chanchinpha a tângko pi tau. A lawi upa pa'û Peter le Rome khawpi a bungbu lam in a khenden ui. A Lalpa a ding in a hinna a chên tai. Nungzui Thoma le India gam in Madras a Pathian ho ah a khupdin lai tak in Hindu thiampu te'n a nunglam a cheicha'n a khawu ah zia chu thuak zolo in a hinna a lân tai. Mathia, Isakariot thasang ding ah a têt pa'û khale Jerusalem

a gingtute sukgenthei lai in chema a lu a tan piak ua, ama'n le a hinna a chên tai.

Thatdaia hi Eddessa gam ah a chia ah, alengpau leh mi tamtak Lalpa Jesu min in a natnau a sukdam piak a, a Lalpau a kipak a, dangka, sana tamtak a pia himaleh a man a la nuampua, kenle ka neisun sun nusia hung ka hi'n tuhi bangtin em ka lak thei di ti in a nial hi. Mi tamtak a pianthak sak ziak in a gam mipi a lungawi puau a. Kum 72 a hi in a khenden tau. Ama'n le a Lalpa a ding in a hinna a chên tai. A suapipa Jacob Zebedai cha khale nungzui te lak a Martar masa pen a hi. Herod in Judate kipaksak a gua a tha a hi (Nasepte 12:2).

Bartholomai khenkhat in hing zing pum a vun a lip ua khenkhat in dip suang ah kân in tuipi a pailut ui a tiu. A bang chu hita leh huaisia tak in a Lalpa a ding in a hinna a chên tai. Andria hi Greek gam khua pakhat Patrae a tiu a chun Kraws a khetden a hi. Khetden ah a umlai in a ma kiang ah hung tapo kiang in Lal Jesu chanchin a la gen sek a mi tam tak in a ging ui. Andria hinle

a Lalpa a ding in a hinna a chên tai.

Hepi Johan hi Bêl lianpi thau suanso lak in a seplut ua bangma a ti puai. Sadrak, Mesak, Abednego te gual in thau suanso hinle a za hina. A law ngaina a hiatlo phat un Patmos thialkal ah a pailut ua, Herod thi nung in bang ti ti a hem in a hungpawt dawk thei hi. Zia taka a umlai hin Thupuan hi a zik a hi. A hung pawtdaw phat in Ephesa khua'n Kochuam Upa'n a pang a, a têt ah lam a zawt theilo, a khutbân in a kai ua "Kihepi tua un" a ti a hi. Tuni hin nungzuite gen tâklo mi dang tamtak a um ui. Gensen di a hi puai.

Ei uh le i Lalpa'n chanchinpha tângko pi dinga ei nutsiate ihiu. Theitawp in thi leh thi ti in pang hitiu. K. Lalthanzama chun "A thilpiak gensenlo te ziak in Lalpa chu banghem ka piak thuk di. A chapa hial it lova ei petu. Lalpa chu bang hem ka piak thuk di. A kiangah hinna lân ingka tin, ka nei bangkim chên ding hima leng, kipak pum in a na sem ingka" a ti a hi.

“KOCHUAM KHRISTA TAKSA”

(Matthai 16: 18-19)

~ *Tv. ST Satboi*
Revival Speaker

Nang Peter la hi, ti ka hun hil belap hi; ahi'n zia suangpi chung ahin ka kochuam chu lem ingka tin; mithi kul kotkhak chun lang zopua'n a. Vangam chabi chu la khut in piang katin, lei ah la kan chu vân ah le kân hintin; lei ah la thap chu van ale thap hi'n a, atia.

Tuni hun ah ahin Kochuam Khrista taksa tihi gen ding dan chuam chuam le aum in mimal Personal tak in le gen thei tho ahi'n maleh Kochuam ti in gen hitiu. I Lalpa Jesu Khrista khawvel ah a len sungin ah um na bial leh a nasepna gam te leh ama ngaina leh gingte khan a mel putdan leh a taksa pian zia amu in ahechian un, Hinla tuhun ahin ama taktak pen taksa mit in muthei ahi taklo ziak in, Khawvel ah ama taksa leh mellat dan mitin muthei ding ah um chu Kochuam hih a hi. Zia Kochuam chu Khrista mel latna leh taksa mutheina pen a hi, ama Lalpa Jesu khrista

lei taksa nei ah mihing melpu ahung um masang in Kochuam ti minpu gen ding a vâng khawp mai in, umnailo ahi tilengle kiti khial din ka ging cha puai. Lei taksa nei leh Mihing melpu ahung um nung leh PA'N asawl gual tak ah nate asepe zawa Van ah akal to ma'n ama mel latna ding in Kochuam ti hi anungzuite kiang leh abik tak ah Peter kiang in ala gen ah, phule aphu det malam hi. van ah akal to zaw nung in Nungzui 12 te apat in Mitin hiat thei leh muthei ding in amel latna leh ataksa Kochuam hi ahung kilang dawak tai. Nasepte bung 2, na thu ah Pentikost ni

Thagau Thiangtho atiam piak gual ah achung un ahung tung tan, hanganna thagaute anei un tuni tiang in Khrista mel latna Kochuam a ding zing a, zia Kochuam chu khawi ah um ahem ? Bang ahem ti lungbuai tak ah hawl ngailo in het thei leh muthei ngal mai in aum zing hi.

Ka kochuam lem ingka :

Ama lei mi melpu ah um taklo ding ziak in Peter kiang in zia Suangpi chung ahin ka kochuam lem ingka tin, mithi kulkawt khak chun lang zo puan ah, ati hi Ama ging ah zuitute chu mithi kulkawtkhak chun anang zo puan, thini na'n achung un vai ahawm thei tapuai ti hi aki chian a hi. Zia Lei ahinle Kochuam dotu tam maleh thina leh Buaina'n a nan zawlo chu Kochuam a hi, dotu tam lai chan in apung deu deu ah. Laphuak tu'n, Lei ah Lalte'n do maleule, agam hung lian deu deu zawn ah, ati hi adik a hi. Ama aum zingna ding leh ataksa muthei ah akilat na ding in Kochuam adin a hi. Gingtute Thagau Thiangtho

in ei chenchil zing theina ding leh kipawl khawm zing theina din ama kiling ngailo Khrista Suangpi chung ah lep ah um te ihu. Rev E Mote, chun, Khrista suangpi chung ah ka ding, mundang vang piaunel tum theina ahi, ti in la'n ala siam dawk hial a hi. Nangmau ah ka um zing gual in, keima ah um zing un, i Lalpa Jesu'n ati, (Johan 15: 4.) Thisan leh thutak ah adin Kochuam ama ah um te apat hin Khawvel miten Khrista mel amu sek uh ahi, eima thinlung ahin Khrista chu Thagau in acheng in Muthei Khrista mel latna Kochuam leh Muthei Khrista mel latna taksa bâk te chu ihu in Khrista'n alep khawm Kochuam te chu ihu.

Nangmau chu Pathian chenna In la hui :

I Korinth 3:16-17 na Sawlchak Paul in agen gual in eimau hi Pathian chen na in, Khrista mel latna Kochuam tak chu ihu. Zia Kochuam leh i taksa i suk siat chun Pathian in bang gual bep in phuba ala ta diam. Kuanle Pathian chenna in asuk siat chun, Pathian inle

HINNA VÂK

suse ding ahi, atia. Tulai in eima hi Pathian chenna In ihi lam le ki helo khawp in, nek leh dawn kisumlo, Mani utna lam bep diksa chawn gingu akitam ta'n kingaitua ahun tak zet tai. Mani ki ngaidam Pathian in ei ngaidam em? ti ngaitualo gingu akipung deu deu tan, Gingu mite mu ding in Khrista mel hi ilia mangzo tau in akilang hi. I gamsung iti na mun ngei hinle gingu mite hin, i um dan un Jesu amu nau em? ti hi ngaitua kham tak a hi.

Philippi 1:27 na'n a gen gual in i um dan tawh Khrista Chanchinpha hi akituak na'm, ti hi gingu nisin ilungput hi leh, Eima ah cheng Pathian thagau thiango hi mite'n mu ding ahiau. Pathian chenna tak hilo Khristian ka hi kiti igam ahin atam deu deu ta'n Pathian Bible thu chialo, Bible ah thu chia sak apung deudeu tak ziak in Gam, Nam, Sungkuan leh Mimal in haksatna tuak to zel ding hi leu hin aki lawm hi. Ei ma dawilam sang ah i sung ah cheng Thagau Thiango

Pathian Aw Bible hin bang lam zawk in ei daw em ? ti gel masak a ngai in, Pathian chenna In suksiat khak ding lau lo ah, mani dawidan leh Khawvel thil lam suksiat khak ding ilau zawk ziak un Haksatna, Buaina thimpi'n ei tuam sek zaw a hi. Pathian chenna In ka hi ti hetzing hi khawvel in a piak theilo thamuanna leh kipakna bulpi chu a hi.

Taksa hi Khrista bak a hi :

Sawlichak Paul mama chun I Korinth 6: 15 a chun, La taksau hi Khrista bakte ahi ti helo la hui em? Khrista taksa bak pakhat la daw ah, nawchizwak bak ah siam ding ka hem? Hinaisai ki hen, atih. Tuni chan inle alui naipuan, hun cheng in athak zing ahi, maleh mihing dawina lam vang chu Nawchizwak bak pakhat sang ale huaise zaw khawvel ahi Hinkhua imat chang atam sek in, Bangtik leh ka huntawp ding ahem ti hi ngaitua in, Grep guipi Khrista tawh ki zawp zing apawimaw hi. Tulai khawvel

ahi'n hun thawveng leh hunpha i dawi in zia chu Pathian pawlna ding lam zawk hilo in, khawvel thil lam zawk aa ding in lungthim ipiak zawk uh hi in akilang tai. Mani nawp dan tak ah hun nuam, hunpha ihawl un imu puau in, haksatna leh beidawn na ituak un, zia phat chule eima lam ki en chianlo in, Pathian lam kai in maw chansakna inei sek un, Pathian awimaw na lungthim inei sek te'u hile thilphalo a hi. Pathian hile umlo ahem ti ah mi tamtak ten agen lawsek ui. I Pathian hi athilbawl zosia'n adik ah pakhat cha hile bawl khial anei puai, Lal David, chun, Lalpa chu atawidan zosia adik hi, ati gual in dik tak ah vaihawm sek i Pathian uh a hi. (Sam 145: 17). Alem guat dan te hi mak in athilbawl dante hi alopi mihing tawidan zosia amu suak ah i tawidan zel ah ei thuk sek i Pathian ahi ti het thak a pawimaw hi. (Jeremiah 32: 29) Tuhun hi Buaina kal ah hun thawveng Pathian

buan hun tak tak chu ahi ti he ten. Pathian tawh kinai na'n amang sek un Buaina leh Haksatna kal ah Khrista mel dawium amu chian sek ui. Amu chian leh hechian tute chun sunggil leh Taksa lam asiam tup sek un Khrista taksa bak ahiu ahe chian un thilpha lo lak leh Sual lak in aki kawi kang sek ui.

Buai na hun, Gam leh Gam Nam leh Nam buaina kal in Biakin tamtak suksiat leh Gingtu tamtak te Hinna lak himaleh, Kochuam Khrista taksa hi puk leh bei mai ding ahi puai. A nâk ah sun tute ngei khanle vaihawm na ma ah ala muchiat in au, atigual in, Suse tu leh That tute ngei inle Vaihawmna ma ado uh Kochuam Khrista taksa hihun he chian ngei in au. Lalpa'n Kumthak, Hunthak eisiam piak in mu leh chang thei ding ah ei siam hi alopi in i hun hawi te hi athawn ah muallian sak mai lo ah Kochuam dotu ginglo mite kiang inle Khrista thu tak hi hetthiam sak ah Vangam chabi hi akhut ua le hawm

HINNA VÂK

khen in Lei ah thap sak ah Van ale thap sak ding in panla zing hitiu. Kumtuang Suangpi Khrista chung ah kilem Kochuam Khrista taksa hi mitin muthei ding in eima ah kawlsak ah um hi hawm zak zel hitiu. Khawmpi thupi tak tak, Synod, Presbytery, Central huap ah KKP leh Bial tiang ah Conference haw imang sek un Thagaulam sang in Taksa lam nunnawp kimu khawmna zawk ah mang ihi tadiam uh aw! Ti bang ngaitua na um kha sek hi leh akilawm hi. Khen khat te chu chia khaklo na ahi man ah chia. Mu nawp nei ziak ah pang ham ham gual ah Gingtute kipawl khawm na pang bang le ki um ding in ginchak ah um hi. Ihun mat teu hi kumzabi pagiatna Jawlnei Isai, Hosea, Amos, leh Mika te hun lai gual kha ahi ding khak le lau ah um a. Isai 1: 13-14 na agen gual in ihun mat te' u le Lalpa thawkda lam tak ahi ding khak lau ah um in, Khawmpi te ahi na'n ahuat lam leh ajakda lam

zawng ahi khak ding alau um hi. Jawlnei te hunlai inle Khawmpi te Sabbathni te Kutni te haw amang hawi mama un thilpiak te anasan achia khawm atam un maleh Lalpa dawilam ah lungthim apiaklo ziak un Lalpa'n adem a hi. Hun mat tam, thilpiak piak tam leh mipi tam in Lalpa aki pak puan Sunggil lam en tu zawk chun ami te sunggil lam in athîl sek hi. Taksa lam ngaikhawk ah pawlam akilang ding bep ngai tua ihi khak ding teu le alau um mama a. I hunbi mat teu hin umzia giltak nei ahi'n amang tute hi Kochuam Khrista taksa bak ngen ihu in eimau hi Van gam chabi kawl tu ihi ziak un lei ah i kan ding khak uh kiveng in pilvang tak in Lalpa dawilam bang ahem ti hawl zing apawimaw hi.

Kochuam Khrista Taksa Lei leh Van ah kan theithu. Lei leh Van ah tham thei tu, hi hial ding in Lalpa'n mawpuak na liantak ei piak hi ama dawilam ah sem buting thei zel din Lalpa ei malzawl ta hen.

“PATHIAN KO HUN” (Jonah 1:6)

~ *Evan Jamkhawpau*
Lingsiphai

“Pathian ko hun” tichu bangtik lai ah le ko thei zing a hi. Himaleh a tângpi in, vangsiatna leh haksatna, thina leh manthaina tung ziang thei dinmun ah i um phat takleh, Pathian in ei ngaithâk ah ei hukdawk thei khak leh ti in Ama chu i ko sek uh a hi. I Bible changtel uh hile, Jonah Lalpa Pathian apat a jammang ziak ah Lalpa’n a delzui ah, tuipi chung ah thigawpi nasatak a hansak zia kin, a chuanna lawng chu se ziang ding leh mangthai ziang thei ding dinmun ah a um tâk ziak un a lau ma ma’u ah, lawngpu chun Jonah kiangin, “Tho inla, la Pathian ko in! I manthai lona ding un Pathianin ei ngaitua piak thei khak leh” a ti a hi. Tichun Pathian a ko ua, Pathian a hun dawt phat ua chun, Jonah ziak ah zia haksatna chu tuak a hui ti a hun hechian tau a hi. Ziaphatchun, Jonah chu a dawmdawk ua, tuisuagiat sung ah a selut uleh, thigawpi leh tui kinawk chu a hung thip ziang ta mai a hi. Chutichun, Lalpa ko hun tak ah a ko ziak un, siatna huaisia tuaklo in a bit tau a hi.

Ahi’nla, Jonah hin vang chu, thigawpi huaise tak mai a tuak tiang inle Lalpa ko ding a gaw nai diak pua, siatna huaisia zaw diak a tuak to zel a hi. Tuisuagiat sunggil lam pek ah ngapi sung tiang a va tun khawlaw nalai a hi. Ngapi sung

tiang a hang tun zet a khan chu vang, a beidawng takzet ta hi ding a hia, ti ngaina hetalo in Lalpa a hun ko khawng khawng ta a hi. “Ka lungdawn tawpkhawk in Lalpa chu ka ko ah, ama’n ei dawnhu tai. Sheol gilpi sung ah kipat in ka

HINNA VÂK

hun ko ah, nangin ka aw la he tai” ati a hi. (Jonah 2:2) Jonah hinle buaina leh haksatna a tuak lim lai ah Pathian ko hun a hin, a Pathian hi ala ko hileh chu ziagual ah huaise zaw diak hi tuak khello maithei a hia; Lalpa ko hun ah ala ko lo ziakin, a huaise zaw diak a tuak to pek a hi. Ziagualmachun, ei uh le tuhun a hin Lalpa i ko lo ua a hichun, danleh siatna huaisia zaw diak ah lut kha thei ihu ti hi ngaitua a ngai a hi.

Chuleh, Judate khale Jawlnei Jeremiah in a chung ua siatna tung ding a genlawk lai a khan, Lalpa lam ah kihei kit ah, a umdan te’u siampha kit dingin a hil ah, “Tuhin la umdan te’u leh la bawl dan zosiau kisiam phau inla, Lalpa la Pathian un a thugente hi mang un; chutileh, la chung ua siatna hung tung ding ala gendawsa zosia hi la mang dingin a lungthim hei danglam kit ziang ding a hi” (Jeremiah 26:13) tiin hil maleh, Lalpa lam ah kihei ah Ama a ko diaklo ziak un, Lalpa’n Pathian helo Babulon

Lengpa Nebukadnezar khutin a pedawk ah, suak leh sal ding in Babulon lamin a puimang siksek ta a hi. Kum 70 sung (khangkhat) zet chu genthei tak mai in Babulon te suak leh sal in a um tau a hi. Vangsiatna huaise zaw diak a chung ua ahungtun phatin Lalpa chu a hunhawl pan ua, Lalpa chu a hun ko tau a hi. “Babulon lui gei a te chun i chu’u ah, i kap sek ua, Zion i ngaituau ah” a tiu a hi kha. (Sam 37:1)

Jawlnei Jeremia’n a thuhil lai a khan, Lalpa lam ala nga kitin Lalpa ala ko hileu chu, kum 70 sung gentheina a thawk u kha thuak khello maithei a hiu ah, Lalpa ko hun ah ala ko lo ziak un da um leh genthei tawpkhawk a thawk khawlaw tau a hi. Ei uh le, Jawlnei Jeremiah gen gual ah Lalpa lam i ngatlo ua, i kisiamthak kit lo uleh, Lalpa’n Pathian helote khut a ei pedawk taleh, i gam ua pat hin ei puimang/ ei nawmang ziang thei tho a hiu hi. Ziiazakachun, siatna huaise zaw diak i tuak masang ua hin

i hinchan i umdan phalo te'um haisan in Lalpa hi ko hitiu. Tuhi Lalpa ko hun a hi.

Lalpa ang ah kingainiam ah, theitawp ah Ama kote Lalpa'n a ngaisaklo ngai puai. Leng Ahasueras hun lai ah, Haman in Judate zosia, a t êk a khang, a lian a neu, numei pawsal ti umlo ah, tha 12 na Adar tha ni 13 ni leh tha gam sik sek ah, a nei alam te'um zosia le gâllâk ah lakpiak siksek ding a guat lai a khan, Lengnu Esther leh Susa khawpi sung ah Juda um zosiate khan, nithum leh zan thum An le nelo, tuile dawnlo in Pathian a ko ua, sukmanghaina ding thu tiam, Media leh Persia dan ah sukdanglam thei tak keilo ding ah lengpa khutsebi ah Seal nam khum sa himaleh, Lalpa'n a lampi ding uh a guanggal piak ah, suk chimit nading thutiam chu phêl thei talo maleu, ki hukdawk theina ding thutiam khutsebi ah seal namkhum thupiak thak

a bawlpiaaka, Adar tha, tha 12 na, ni 13 ni sukmanghai ah a um na ding ni'um chu amau a ding in suakchatna ni, ni lopi tak a hung suak ta a hi.

Ziagualchun, ei uh le, Lalpa a ding ah kisiam pha in, Ama ko leu hin, Ama'n ei ngaitha'n tin, zawna leh suakchakna lopi tak eipe mai ding a hi. I melmate'um hile, ei uh pang se se lo ah ei do piak ding leh ei hun sawlpiaak ziang thei tho a hi. Israelte kha le, a melma'um do piak ding in khuaingal po le mangcha ziang a hi kha lam. Jehoshaphat kha le amelmate kha ama do a ngai tasam dang em! Pathian in a melmate kha ama'um leh ama'um a kisattua sak ah, a ki that gam kei ziang uh a hi kha. (2 Khangthu 20:23)

Eiuhle i hinkhua te'um siampha'n, Lalpa ko leu hin Ama'n ei hukdam mai ding a hi. Lalpa ko ding ngaikhawk thak thei chiat ding in, Lalpa'n i ma'um eipui chiat ta hen.

KNP HUANG

I Synod in gaitaite In ding a sakpiak te'u Inchuanna ding panpina thilpiak dawl piak ding ti ah CKNP te a hung ngansia dungzui in khawhing Kochuam tin te'n panpina thilpiak dawlkhawm na ala ki nei a, zia chu 31st October 2023 ni in Inkuan 55 te kiang in leh 20th November 2023 ni in Inkuan 39 te kiang in hawp dawna Synod Office ah ala kinei hi. Zia a Kochuam tin a sungkuan ti'n te kiphalna kipak um aki san, Bial/Kochuam ah KNP Committee member te a tawmngai na'u kipak um aki sa a hi. Chun Synod Office mun ah van kidawng te haw ei sukfel piak i Ex-Officio te leh Jubilee Kochuam KNP te chung in le kipak thu i gen a hi.

- 1) Lamka Pastor Bial - *Van*
- 2) Panglian Pastor Bial - *Van*
- 3) Mata Pastor Bial - *Van*
- 4) S. Munnuam Pastor Bial - *Van*
- 5) D. Phailian Pastor Bial - *Van*
- 6) Sugnu Pastor Bial - *Van*

- 7) Phaipheng Pastor Bial - *Van leh sum cheng 16,800/-*
- 8) New Lamka Pastor Bial - *Van*
- 9) D. Khawzim Pastor Bial - *Van leh sum cheng 3,800/-*
- 10) Kawlheng Pastor Bial - *Van*
- 11) Dumlian Pastor Bial - *Sum cheng 5,750/-*
- 12) Phailianbung Pastor Bial - *Van*
- 13) Delhi Kochuam - *Sum cheng 17,000/-*
- 14) Guwahati Kochuam - *Sum cheng 12,700/-*
- 15) Munpi Pastor Bial KNP - *Sum cheng 16,800/-*



KKP HUANG

CKKP IN PANPINA PIA

KKP Central committee te'n December 18, 2023 ni'n Relief House (i.e Sumtukphai, Buallian leh S. Bualkot) ah chenglut te sungkuan khat chiat kiang in Anchang Bag khat chiat piak dawna ala nei u'i.

Zia gual ah Central committee ahung chet thei na hi, Branch tin ten Ahun leh Ani kibang ah pauchap khawmna hun ila matnau ah ,i thawlawm dawlkhawm te'u apat a hi. Branch tin hatna jâl liau liau ahi iti lo theilo a hi.CKKP Leader Rev. Lalpiaklian malat na in , Central committee te'n zinglam 7:00 AM ah kipat hawp dawna ala kinei a hi.

Anchang hi zia gual hin hawp ahi : Sumtukphai ah inkuan 11, S. Bualkot ah inkuan 9 leh Buallian ah inkuan 2 te kiangin Khristmas Present in anchang bag 1 chiat piak a hi.

I panlak na teu ziak in zia hi ki bawl thei a hi ziak in kipak thu igen ui.

